

**ՊԱՇՏՈՆԱԿԱՆ ԸՆԴԴԻՄԱԽՈՍԻ
ԿԱՐԾԻՔ**

ՄԱՐԻԱՄ ԱՐԹՈՒՐԻ ՀԱԿՈՔՅԱՆԻ

**«ԱՄԵՐԻԿՅԱՆ ՆԵՈՌՈՄԱՆՏԻԶՄԻ ԳԵՂԱԳԻՏՈՒԹՅԱՆ ՁԵՎԱՎՈՐՈՒՄԸ
ՋԵՔ ԼՈՆԴՈՆԻ ՍՏԵՂԾԱԳՈՐԾՈՒԹՅՈՒՆՆԵՐՈՒՄ»**

Ժ.01.07-«Արտասահմանյան գրականություն» մասնագիտությամբ բանասիրական գիտությունների թեկնածուի գիտական աստիճանի համար ատենախոսության մասին

Մարիամ Հակոբյանի «ԱՄԵՐԻԿՅԱՆ ՆԵՈՌՈՄԱՆՏԻԶՄԻ ԳԵՂԱԳԻՏՈՒԹՅԱՆ ՁԵՎԱՎՈՐՈՒՄԸ ՋԵՔ ԼՈՆԴՈՆԻ ՍՏԵՂԾԱԳՈՐԾՈՒԹՅՈՒՆՆԵՐՈՒՄ» թեկնածուական ատենախոսության վերաբերյալ.

Մարիամ Հակոբյան ատենախոսությունը գիտականորեն պատշաճ ձևակերպված համալիր ուսումնասիրություն է, որն առանձնահատուկ փորձ է նոր դիտանկյունից քննության առնելու Ջեք Լոնդոնի ստեղծագործական աշխարհը: Այն փաստը, որ գրաքննադատների մեծ մասը դասում են այս ամերիկացի հեղինակին ռեալիստների շարքին, որոշ դեպքերում նաև կապ են նկատում նատուրալիզմի հետ, հետաքրքրական է դարձնում այս աշխատությունը:

Մարիամ Հակոբյանի ատենախոսության թեման **արդիական** է, քանի որ Լոնդոնի ստեղծագործությունների կիզակետում մարդկային ճակատագիրն է և գլոբալիզացված քաղաքակիրթ աշխարհի խնդիրները:

Ատենախոսության **գիտական նորույթը** պայմանավորված է ամերիկյան նեոռոմանտիզմի, ինչպես նաև Լոնդոնի երկերում նեոռոմանտիկ գրականության գեղագիտության ձևավորման նորովի մեկնաբանմամբ և Լոնդոնի զգալի թվով ստեղծագործությունների լուսաբանության առաջին փորձով նեոռոմանտիզմի համատեքստում:

Ատենախոսության **նպատակն է** բացահայտել նեոռոմանտիզմի հիմնական առանձնահատկությունները, ուսումնասիրել ամերիկյան նեոռոմանտիզմի առանձնահատկությունները, ինչպես նաև առանձնացնել Լոնդոնի արձակում ամերիկյան նեոռոմանտիզմին առնչվող գեղագիտական ու գաղափարական բաղադրիչները:

Ատենախոսությունը բաղկացած է ներածությունից, երեք գլուխներից, եզրակացությունից և գրականության ցանկից:

Ատենախոսության առաջին գլուխը՝ «**Ամերիկյան նեոռոմանտիզմի առաջացման նախադրյալները**», նվիրված է նեոռոմանտիզմի առաջացման, պատմության վերլուծությանը, ինչպես նաև անդրադարձ է արվում տարբեր գրականություններում նեոռոմանտիզմի դրսևորումներին:

Ատենախոսության երկրորդ՝ «**Մարդ-բնություն-քաղաքակրթություն շղթան Ջ. Լոնդոնի նեոռոմանտիկական ստեղծագործություններում**» գլուխը նվիրված է մարդ - կենդանի փոխհարաբերություններին, բնություն - քաղաքակրթություն առնչությանը նեոռոմանտիզմի գեղագիտության շրջանակներում:

Ատենախոսության երրորդ գլուխը՝ «**Բացառիկ հերոսի նեոռոմանտիկական մեկնաբանությունը Ջեք Լոնդոնի վեպերում**», նվիրված է բացառիկ նեոռոմանտիկ հերոսի վերլուծությանը Ջ. Լոնդոնի «**Լուսնի հովիտ**», «**Երկաթե կրունկ**», «**Ծովագայլը**» վեպերում, քննվում է «**Ձապաշապիկը**» վեպում նկարագրվող ճամփորդությունը՝ որպես հոգևոր մաքառման, իրականությունից փախուստի, ազատության հասնելու միջոց, իսկ «**Մարտին Իդեն**» և «**Մեծ տան փոքրիկ տիրուհին**» վեպերում ներկայացվում է մահվան փիլիսոփայությունը որպես ազատագրման միջոց, ինչպես նաև խորն անդրադարձ է արված Լոնդոնի վեպերում կին կերպարներին:

Ատենախոսության **Եզրակացություն** բաժնում ներկայացված են այն հիմնական դրույթները, որոնց ատենախոսը հանգել է ուսումնասիրության արդյունքում և որոնք պատասխանն են ատենախոսության սկզբում առաջադրված հարցադրումներին:

Սեղմագրում ներկայացված դրույթները և տպագիր աշխատանքները համապատասխանում են ատենախոսության բովանդակությանը:

Ցանկանում ենք նշել, որ ատենախոսության գիտական նորույթի հիմնավորումը փորձարարական է, սակայն առավել համոզիչ դարձնելու համար սույն ատենախոսության հիմնական թեզիսը՝ այն է. Ջեք Լոնդոնը նեոռոմանտիզմի ներկայացուցիչ է, մեր կարծիքով, պահանջում է առավել խորքային մոտեցում: Ողջունելի է այն, որ Մարիամ Հակոբյանին հաջողվել է Ջեք Լոնդոնի ստեղծագործությունների դիպուկ ընտրություն («Լուսնի հովիտ», «Բոցավառ արշալույս», «Մեծ տան փոքրիկ տիրուհին», «Ծովագայլը», «Մարտին Իդեն»), որոնց պատումի և կերպարների միջոցով բացահայտվում է նեոռոմանտիկական տեխնիկայի առկայությունը Ջեք Լոնդոնի գրվածքներում: Ատենախոսության մեջ մաքսիմալ կերպով անդրադարձ է արվում այն ուսումնասիրողների աշխատություններին (Ի. Կլիմենկո, Ն. Պախսարյան), ովքեր ապացուցելի կերպով քննության է առել Ջեք Լոնդոնի նեոռոմանտիկ միտվածությունը:

Ատենախոսության մեջ նաև ներառված են թարգմանություններ, որոնք կատարվել են Մարիամ Հակոբյանի կողմից: Ցանկալի է այս գեղարվեստական թարգմանությունները փոխանցեն նեոռոմանտիզմի գեղագիտական դրույթները, քանի որ մինչ այժմ արված թարգմանչական նյութը արտացոլել է Լոնդոնի ռեալիստական գրելաոճը:

Ատենախոսության հեղինակը փորձ է կատարել նաև կապել Ջեք Լոնդոնի ստեղծագործությունների նեոռոմանտիկ բնույթը անիմալիզմի հետ, ավելի ստույգ,

անիմալիստական սիմվոլիկայի հետ, սակայն, մեր կարծիքով, այս մոտեցումը **կարելի** էր առավել փաստարկված կերպով անել: Մարիամ Հակոբյանի ատենախոսության գրականագիտական ուղղվածությունը անհերքելի է, սակայն հաշվի առնելով այն թաստը, որ նեոռոմանտիզմը անմիջական փոխկապակցվածություն ունի հոգեբանության հետ, կարելի էր առավել մանրակրկիտ դիտարկել այս կապը: Սույն ատենախոսությունը, այնուամենայնիվ, փորձ է նորովի ներկայացնել մի գրողի, որի վերաբերյալ կան բազմաթիվ ուսումնասիրություններ, սակայն այս ատենախոսության հեղինակը այլ հարթության մեջ է դնում և՛ Լոնդոնին, և՛ նրա ստեղծագործությունները:

Այդուհանդերձ, հարկ ենք համարում ներկայացնել հետևյալ դիտարկումները.

1. Հաշվի առնելով այն փաստը, որ ամերիկյան նեոռոմանտիզմը համարվում է մի գրական ուղղություն, որը բնութագրվում է վերադարձով դեպի ռոմանտիկական իդեալներ, հատկապես, շեշտադրելով էմոցիաները, երևակայությունը և բնության գեղեցկությունը, ինչը և յուրահատուկ պատասխան էր մոդեռնիստական աշխարհի սառնությանը, ցանկալի կլիներ, որ Մարիամ Հակոբյանը դիտարկեր և քննության առներ Ջեք Լոնդոնի ստեղծագործություններում ինտրոսպեկցիայի և հոգեբանական միտվածության խնդիրը, որոնք ներմուծված են Ջեք Լոնդոնի վեպերում սիմվոլիկ էլեմենտների միջոցով:

2. Ներածության մեջ՝ էջ 3-ի վրա, հանդիպում ենք հետևյալ նախադասությանը. «Ամերիկյան նեոռոմանտիզմի ամենահայտնի ներկայացուցիչը Ջեք Լոնդոնն է»։ Սակայն, մեր կարծիքով, այսպիսի պնդումը փոքր-ինչ ճշգրիտ չէ, քանի որ, նախ, Լոնդոնին գրականագետները դասում են հաճախ «ռեալիստների» շարքին, նաև այն պատճառով, որ ամերիկյան նեոռոմանտիզմի ցայտուն ներկայացուցիչներ են Ջոն Էշբերին, Բիրսը, Քեյ Բոյլը (արձակ) և Չարլզ Բերնստայնը (պոեզիա):

3. Ցանկալի կլիներ Մարիամ Հակոբյանի ուսումնասիրության մեջ տեսնել զուգահեռներ Ժան-ժակ Ռուսոյի «բնական մարդու» փիլիսոփայության հետ, քանի որ նրա կողմից քաղաքակրթության քննադատությունը անմիջական կերպով անդրադարձվեց նեոռոմանտիզմի ստեղծագործությունների վրա:

4. Չնայած Մարիամ Հակոբյանի աշխատության մեջ դիտարկվել է Զիգմունդ Ֆրոյդի «հոգեվերլուծության» տեսության կապը Լոնդոնի կերպարների հետ, սակայն, մեր կարծիքով, աշխատանքը կշահեր, եթե ներկայացված հարցադրումները քննության առնվեին Կ.Գ. Յունգի արքետիպերի տեսության ներքո, քանի որ նեոռոմանտիզմը, առհասարակ, և մասնավորապես, ամերիկյանը, սերտ փոխկապակցված են այս տեսության հետ:

Նշված նկատառումները չեն նսեմացնում ատենախոսի կատարած ուսումնասիրության գիտական արժեքը, ավելին, դրանք մատնանշում են թեմայի ավելի խորը քննության հնարավորություն:

Այսպիսով, ՄԱՐԻԱՄ ԱՐԹՈՒՐԻ ՀԱԿՈԲՅԱՆԻ «ԱՄԵՐԻԿԱՆ ՆԵՈՌՈՄԱՆՏԻԶՄԻ ԳԵՂԱԳԻՏՈՒԹՅԱՆ ՁԵՎԱՎՈՐՈՒՄԸ ԶԵՔ ԼՈՆԴՈՆԻ ՍՏԵՂԾԱԳՈՐԾՈՒԹՅՈՒՆՆԵՐՈՒՄ» թեմայով ատենախոսությունը բավարարում է թեկնածուական աշխատանքին ներկայացվող պահանջներին:

Վերը նշվածը հնարավորություն է տալիս միջնորդել Երևանի պետական համալսարանում գործող ՀՀ ԲԿԳԿ-ի՝ 066 «Արտասահմանյան գրականություն» մասնագիտական խորհրդին՝ ՄԱՐԻԱՄ ԱՐԹՈՒՐԻ ՀԱԿՈԲՅԱՆԻ «ԱՄԵՐԻԿԱՆ ՆԵՈՌՈՄԱՆՏԻԶՄԻ ԳԵՂԱԳԻՏՈՒԹՅԱՆ ՁԵՎԱՎՈՐՈՒՄԸ ԶԵՔ ԼՈՆԴՈՆԻ ՍՏԵՂԾԱԳՈՐԾՈՒԹՅՈՒՆՆԵՐՈՒՄ» Ժ.01.07-«Արտասահմանյան գրականություն» թեմայով ատենախոսության համար շնորհել բանասիրական գիտությունների թեկնածուի գիտական աստիճան:

Անահիտ Եգանյան
բանասիրական գիտությունների թեկնածու, դոցենտ

Ռեզեզ

Ա. Եգանյանի ստորագրությունը հաստատում եմ

ԵՊՀ գիտական քարտուղար

24.06.2025



Վ. Գրիգորյան

Մեղակ
2